

## 每週經課朗誦經文(巴克禮台語漢字)2013/10/13

### 共同經課 - 1 耶利米書二十九章一節，四節～七節

1 先知耶利米對耶路撒冷寄批互受掠猶佇啲者的老大，及諸個祭司、先知、眾百姓，就是尼布甲尼撒對耶路撒冷掠到巴比倫者。4 批內講：「萬軍的耶和華——以色列的上帝對一切受掠去者（就是我互 in 對耶路撒冷受掠到巴比倫的人）按呢講：5 恁著起厝，來倚起，作園來食伊的果子；6 娶某來生子，查某子，給恁的子娶某，互恁的查某子出嫁，互 in 生子，查某子。通佇遐加添多多，無減少。7 我所互恁受掠去彼個城，恁著圖謀伊的平安，替伊祈禱耶和華；因為伊得著平安，恁亦隨伊平安。

### 共同經課 - 2 詩篇六十六篇一節～十二節

1 〔一篇詩歌，交互樂官。〕全地攏著對上帝來出歡喜的聲！2 唱歌謳啲伊的名的榮光！用謳啲的話來顯明伊的榮光！3 著對上帝講：你的所做到許通驚！因為你的大權能，你的對敵欲降服你。4 全地欲敬拜你，吟詩謳啲你，欲吟詩謳啲你的名。（細拉）5 恁著來，來看上帝所行的事，伊對世間人所做的不止通驚。6 伊將海變做乾地，in 步行過河；佇遐阮因為伊來歡喜。7 伊用伊的權治理，直到永遠。伊的目矚監察列邦；悖逆的人毋通自高。（細拉）8 萬百姓啊，恁著謳啲阮的上帝，互人聽見謳啲伊的聲。9 伊互阮的生命活啲，亦無互阮的腳搖動。10 上帝啊，你曾試驗阮，鍛煉阮，親像鍛煉銀一樣。11 你互阮入羅網，用重擔下佇阮的身上。12 你互人坐車搬(pôa<sup>n</sup>)過阮的頭殼；阮經過水火，總是你互阮到富有的所在。

### 共同經課 - 3 提摩太後書二章八節～十五節

8 你著記得對大衛的後裔所出的耶穌基督，伊對死人中復活，抵抵照我的福音。9 我為著此個受苦，甚至受縛，親像行歹的人一樣。總是上帝的道理無受縛。10 所以我因為受揀的人來吞悞一切的事，互 in 也有份佇基督耶穌的拯救及永世代的榮光。11 有一句通信的話就是講：咱若及伊同死，也欲及伊同活；12 咱若吞悞，也欲及伊相及做王；咱若毋認伊，伊也欲毋認咱；13 咱若失信，伊猶原是信實，因為伊袂會背家己。14 你著將諸個代誌互人記得，也佇主的面前吩咐 in：毋通因為言語來相諍；這是無利益，閣會敗壞聽的人。15 你著致意互上帝看你做可取的，做免見誚的做工人，照正意來開拆真理的道。著閃避粗俗的虛詞。

### 共同經課 - 4 路加福音十七章十一節～十九節

11 耶穌去耶路撒冷的時，對撒瑪利亞及加利利交界經過。12 入一個鄉社的時，有十個癩瘡(thái-ko)的，抵著伊，遠遠啲倚，13 出聲講：「耶穌，先生，憐憫阮！」14 耶穌看見，給 in 講：「恁去將本身互祭司驗。」in 去的時就得著清氣。15 其中一人看見家己已經好，就倒轉來大聲謳啲上帝，16 仆落佇耶穌的腳前來感謝伊；此人是撒瑪利亞人。17 耶穌應講：「十人豈無攏得著清氣嗎？彼九個佇叨落？」18 此個別族的人以外，猶無別人倒轉來歸榮光上帝嗎？」19 就給彼人講：「起來，做你去！你的信有救你。」